



Број/Број: 01,02,03,03/11-05-1-199/12
Сарајево/Sarajevo: 5. 11. 2012.

ZABILJEŠKA
sa sastanka Komisije za vanjske poslove PDPSBiH s delegacijom Komisije za
vanjske poslove Parlamenta Švicarske,
održanog 2. 11. 2012.

Delegacija Komisije za vanjske poslove Parlamenta Švicarske, u kojoj su bili: Hannes German, predsjednik Komisije i šef delegacije, te članovi Pirmin Bischof, Karin Keller-Sutter, Christian Levrat, Luc Recordon i Anne Seydoux-Christe, u okviru posjete Parlamentarnoj skupštini BiH bila je gost Komisije za vanjske poslove Predstavničkog doma PSBiH.

U ime Komisije za vanjske poslove sa švicarskom delegacijom su razgovarali: Mirza Kušljugić, predsjedavajući Komisije, te Zvonko Jurišić, zamjenik predsjedavajućeg, Mirsad Đugum i Mladen Ivanković Lijanović, članovi Komisije.

Susretu dvije delegacije prisustvovali su i ambasador Švicarske u BiH Nj. E. André Schaller, te osoblje Ambasade.

U razgovoru dvije delegacije razmijenjene su informacije, iskustva i razmišljanja o strukturi i organizaciji političkog sistema BiH i Švicarske, ekonomskim pitanjama i mogućim oblicima saradnje dvije zemlje, te pomoći Švicarske Bosni i Hercegovini na političkom i ekonomskom planu.

Gosti iz Švicarske pokazali su veliko zanimanje za saradnju u regionu, posebno s BiH jer u Švicarskoj živi, kako su istakli, brojna bh. dijaspora, s više od 70.000 građana porijeklom iz BiH, među kojima je oko polovina s dvojnim (švicarskim i bh.) državljanstvom.

Ističući sličnost političkih sistema BiH i Švicarske, gosti su naglasili da njihov sistem ima više od stotinu godina iskustva u saradnji različitih nivoa vlasti, te izrazili nadu da će BiH pronaći nove puteve saradnje različitih nivoa vlasti, budući da federalni nivo organiziranja traži mnogo odgovornosti s obzirom na sve manjine (u Švicarskoj, npr., vjerske i jezičke).

Članovi Komisije za vanjske poslove PDPSBiH na kraju su pokazali zanimanje za švicarska iskustva u oblasti poreza, posebno za stopu PDV-a od 8% i finansiranje države, za stranačko organiziranje s obzirom na jezičke i vjerske manjine, za iskustva u finansiranju zdravstva, ukazujući pri tome na našu tešku ekonomsku situaciju, uprkos bogatim resursima koje ima BiH, za podijeljene nadležnosti različitih nivoa vlasti, za veliki broj bivših vojnika, invalida, penzionera, veliki broj nezaposlatih, za fiskalnu politiku i način finansiranja koji je u BiH, za razliku od švicarskog modela, a prema općem mišljenju, skup, neracionalan, neefikasan, čak i diskriminacijski.

Gosti su ukazali na to da u Švicarskoj svaki nivo vlasti ima svoje poreze, ali da je općina najvažnija, te da je rangirana na prvo mjesto i građani svake godine odlučuju o stopi poreza. Najvažnije su stvari ipak na nivou kantona, a Konfederacija se finansira iz poreza na dodatu vrijednost, te je 8% PDV-a sasvim dovoljno za funkcioniranje države.

Gosti su ukazali i na to da je Švicarska u 19. stoljeću imala iste ili slične probleme siromaštva, ali da BiH danas ima veliku i bogatu dijasporu i školovane ljude, te da ljudima u BiH ne manjka poslovnih ideja, kao ni motiva za rad.

Gosti su konkretnim primjerima ukazali i na švicarsku ekonomsku pomoć BiH, posebno onu koja se pruža bh. građanima u Švicarskoj, navodeći konkretno podršku povratnicima koji žele početi poslove u BiH (tvornica voćnih sokova i košulja). Što se tiče organiziranja političkih stranaka, naglašeno je da su one organizirane na državnom nivou, pa tako nisu osnovane ni na (jedno)jezičkom ni na (jedno)vjerskom principu. Finansiranje zdravstva podijeljeno je između države (manji dio) i osiguranika koji uplaćuju doprinose zdravstvenim osiguravaocima, s mogućnošću da država intervenira u socijalnim slučajevima. Zdravstvena njega i zdravstvena zaštita su u nadležnosti kantona. Gosti su ukazali i na moguću reformu srednjoškolskog obrazovanja u BiH po švicarskom modelu, jer imaju podatke da je u BiH više od 60% mladih nezaposleno. Prema tom modelu, mladi bi završavali škole koje im odmah nude poslove u struci koja traži praktična, a ne teorijska znanja, a iskazali su i spremnost za pomoć u eventualnoj ustavnoj reformi, reformi javne uprave i slično, budući da tu imaju duga i bogata iskustva.

Na zajedničkom ručku u restoranu PSBiH dvije delegacije nastavile su neformalnu razmjenu mišljenja i iskustava i razgovarale o budućoj saradnji parlamenata dvije zemlje.

SEKRETAR
KOMISIJE ZA VANJSKE POSLOVE

Merdžana Iglica

PREDSJEDAVAJUĆI
KOMISIJE ZA VANJSKE POSLOVE

Mirza Kušljugić